

國朝耆獻類徵初編卷百三十五目錄

諫臣三

沈愷曾

鄭恂

史申義

劉灝

吳暲

楊崙

王銓

陳沂震

顧楷仁

陳嘉猷

陶彝

高玠

阮應商

閔珮

汪繼燦

秦道然

王澍

甄之璜

許志進

向日貞

李元直

補錄

王原

張瑗

陸師

王欽

東晉書

卷二

王欽

吳越

卷二

王欽

吳越

卷二

卷三

國朝書牘錄存卷三十五目錄

十五目錄

國朝耆獻類徵初編卷百三十五

通奉大夫前署江西巡撫江西布政使司布政使湘陰李桓輯

諫臣三

沈愷曾

仁廟有御史曰沈公愷曾字虞士號樂存浙之歸安人沈故吳興
著姓元至正閒名子敬者實始居歸安之竹墩是爲竹墩沈氏沈
氏自明迄今以甲科躋顯仕者相望明萬歷庚辰進士歷官兵備
副使名子來者公之高祖也子來生倣烜歲貢生任華亭縣訓導
倣烜生燕卿庠生 贈文林郎燕卿生鉞歲貢生 封奉直大夫
公之父也公少瑰偉絕特語出驚人年十七中康熙丁巳科舉人

就會試以從兄宮贊三曾閣學涵分校例當引避壬戌成進士選翰林院庶吉士辛未改山東道監察御史御史有言職自明設爲十三道亞都御史而本朝因之其爵秩不甚尊然稱是職者率難其人若公者乃所謂真御史矣仁廟時朝廷清明官事無闕然公於其時疏慷慨數十上語皆切直其最著者辛未喀爾喀內附車駕親巡邊邑公上疏曰臣聞皇上有巡行口外之典無非爲蒙古諸臣定賞罰編戶口安插新附此誠皇上如天之仁欲使百萬生靈無一夫不獲其所但聖躬遠出閒關崎嶇且其地風土迥異服食起居未必與時順適乘輿勞頓於外羣臣宴息於家臣心何安況近命部院大臣先行料理止須逐一奏聞

於紀功錄過之中寓慶賞刑威之意仍與 皇上親行無異叩乞
傳 旨暫緩此行疏入一時大小臣工俱爲震懼後 駕還頗思
公言 召對 賜宴丙子 上親征噶爾丹歲暮以餘黨未靖
駐蹕塞上公請 回鑾疏曰欽惟我 皇上親政臨民睿慮周詳
雖最勞最苦之事莫不躬親身歷寒暑備嘗今 聖躬親臨沙漠
功成奏凱猶以小醜游魂未盡殄滅 皇上綢繆布算總爲蒼生
計出萬全但邊塞沍寒十倍內地 萬乘至尊一年之間戎衣弓
矢數歷奇勞在廷大小臣工莫不引領 乘輿不遑寢處請 皇
上俯允回鑾庶臣等負暄獻曝之私得以稍慰安溪李文貞公督
學順天時丁母憂有 旨奪情自陳請給假九月公拜疏劾之又劾

閣臣票擬不當科員封駁不聞謂臣思父母之喪天下之通喪也
皇上以李光地文行素著特爲簡拔原從維持名教起見方吏
部題請終制爲閣臣者職司票擬理應委曲奏請始不當有在任
守制之票旣不當有仍遵前 旨之擬試思學臣關係唯名教爲
緊要 皇上方以禮義廉恥難進易退之義鼓勵再三而閣臣身
居密勿正宜以此爲進退百僚之準豈親喪大典反不爲緊要乎
至於科臣法司封駁閣臣有所未當科臣繳 旨覆奏固其職也
乃科臣亦復默然臣不知其所封駁者何在也臣不敢以妄擬閣
臣爲嫌劾奏同列爲咎又請免富民納官疏曰 國家設官分職
量才擢用下至吏員一官亦必三考稱職然後予以一命之榮所

以慎重官方者如此其重也自事例既開遂有八品頂帶榮身之
典此不過暫假微末之虛名以資鼓舞近者廷臣議覆陝西提臣
孫思克請開事例疏內開一款富民捐米若干與六品若干五品
若干四品三品夫四品三品之官皆係大僚品級乃以目不識丁
之鄉愚忽而紅頂錦衣與九卿巡撫大臣混淆無辨雖屬虛銜似
與慎重名器之意不合臣請 敕部停止未必於國體無少裨益
他如假監之株累則請嚴局騙之棍徒而無知被騙者許以自首
逃人失察之處分過嚴則請仍準功過相抵之條以明激勸北征
大兵糧餉總督于成龍不當遷延輸運違誤軍需廣東撫臣高承
爵已請離任守制不當於一切人命盜案仍然照常具題忘哀戀

職其慷慨切直無所瞻徇多此類其請疏太湖淤滯疏則極講詳究於宋元明已來諸家如單氏郝氏蘇氏以暨夏氏原吉歸氏有光海氏瑞徐氏獻忠之議而分析條理窮竟源委以折其衷當時雖部議格不行然公所著東南水利議一書至今論者與公子世棟等所編西臺奏疏並稱碩畫焉蓋公官御史凡七年嘗以山東道監察御史協理陝西道事巡視中城旋掌山東山西事其明年督理寶源寶泉二局又明年掌江南道事值東宮大婚監禮賜蟒是年又管理登聞院事甲戌監武會試今閱卷分南北試期各以三日準文闈公所請定者也尋又掌浙江道事越丙子監順天武鄉試掌京畿道事明年丁丑充殿試監試官掌河南道事加


三級 覃恩授奉直大夫戊寅又加四級及己卯巡視兩廣鹽課
巡鹺例一年而代公獨畱再任辛巳復 命掌山西道事丁外艱
歸會以運使某里誤辭連及罷其視鹺兩廣也多惠政設折舊完
新法清積餉五十餘萬兩積引百萬餘道商困以蘇復兩疏請免
漁引鹽耗商民俱德之故有再任之 命其在臺中也憲長遂甯
相國以屬禮繩諸御史公抗言臺臣無屬禮援引侃侃不屈遂甯
爲改容屢薦於 上時同臺當湖陸公正色立朝不少假借與公
雅相推重而河臣靳公入 覲見公於班聯屬目久之揖而曰是
沈御史耶真御史也其見重於當時諸名臣如此乙酉歲 聖駕
南巡召試 行在稱 旨 賜御書戊子己丑閒歲大饑議設廠

賑粥然饑民匍匐數十里僅一飽及歸而飢如故或更有老弱不能皆來且來而不得飽者更或有飢極而恣飽飽而反致斃者公按期給發計口授粟子弟持籌人無中飽惠均而全活者無算遠近效之至其敦孝友恤宗黨葺祠宇置墓田居鄉諸事都有可傳詳見家乘公狀貌魁梧遇事敢言節槩凜凜及其與人則躬躬謙下雖淺夫孺子如貴客然平時詩酒自娛然與親朋談讌或至竟日人未見其號呶失度者詩有來雨吟橐若干卷四書義名蘋洲偶存長洲學士何公選入行遠集凡若干篇四方傳誦焉卒年四十九子九人皆以文學世其家

贊曰昔歐陽子有言司諫七品官耳而天下之得失一時之公議

係焉故學古懷道者仕於時不得爲宰相必爲諫官官雖卑與宰相等如沈公者庶乎不負其官者歟

右傳姚世鈺代某撰



鄭恂

故侍御鄭公歿之明年孤兆龍等旣卜宅兆謀徵銘讀學薄公召正靖命之曰嗚呼是吾與爾先君之同年友也其生平愼靜而質言於人不尙辭服官中外退休於家不失其素守吾嘗與同朝知之爲詳老而傷逝悲不能爲言也爾方有職於史其以是銘已而兆龍等以公命來謁靖旣弗獲辭爰考公所自序及兆龍等所錄敬識其可傳者示後公諱恂字慄庵先世江右人明永樂中遷豐潤之鄭家莊子孫聚居閱十世皆以儒業傳考諱某母楊氏夢青衣人自空中下入於寢覺而生公性沈敏始就傳讀書功兼數人研精覃思天大雷雨弗覺也甲子秋舉京兆明年遂成進士除閬

中令地瘠民貧上官之求索令長之供億悉取諸民公志欲盡除之具陳疾苦狀嘗慷慨語郡守百姓何罪辦正賦外尙敲扑不已耶守默無以應然竟不能除也公乃自除其供億而節量以應諸臺之求民獲少甦閭士向學而無師科名寥落公勤教之文風遂振終公在事獲雋者二十餘人轉相師授以成名者尤多舉治行爲蜀省第一會秦晉歲旱 聖祖精求良吏撫綏擢公知隰州晉吏治大抵如蜀公爲牧如其爲令減火耗蠲繁費教民通緩急以應賦稅又大招流亡築室予牛種民襁負至隰故多盜據險剽奪莫能制公撫之不聽誅其魁餘悉奔散境內清治遷工部都水司員外郎居三月拜河南道監察御史再疏清滇省開例之弊移大

同積米餉軍皆報 允坐累罷歸公高志氣能自樹立始爲諸生
時例從令謁 先師廟父兄樂爲子弟盡飾公家故貧衣襖甚皆
笑之公曰緼袍不恥吾志也成禮而已何以飾爲其淡泊本天性
故其後居官能以廉節自厲齋廚蕭然約已務施民懷惠焉遷代
去炷香送者不絕在臺中請屬不行或持苞苴至正色叱出之旣
而事敗公獨不被議嘗特受 命清查三庫吏進杯茗亦卻之初
遇 覃恩授文林郎晉階奉直大夫考追 贈母追 封公之少
也贈公館百里外卽蹙蹐不安贈公歿公殯葬如禮不以無爲解
官京師楊太宜人以年高不肖就邸舍公遂懷歸志已而得歸歡
然就道曰吾願足矣蓋朝夕定省者又十餘年太宜人年九十有

二乃卒公年亦且七十矣在禮惟衰麻爲喪公歆粥枕山若喪贈
公時君子尤以爲難生順治辛卯八月十五日卒於雍正庚戌十
一月初九日初娶於張 贈宜人繼娶於江能佐治家政累 封
宜人子兆龍兆鯨兆鯤兆蜚兆蛟兆熊以某年月日葬公某所嗚
呼某少偏露不克從先君子後見於執友壬辰來京師始識薄公
病癩不喜走趨所未見者猶多如公亦其一也迨今又二十年而
先君之友存者無幾乃執筆以銘公之藏於以知先君所與同舉
者皆一時之選觀公之自序以質而信又以知薄公所稱爲不苟
銘曰

維鄭之先世以儒稱自他有耀迨遠乃興維公之興精治其業弗